

QUAE MAXIMA ILLUSTRIORAQUE  
RERUM GESTARUM MONUMENTA  
HISTORIAE ECCLESIASTICAE AERAM ALTERAM

AB CONSTANTINO PRIMO CHRISTIANI NOMINIS IMPERATORE  
AD MAGNUM USQUE GREGORIUM PONTIFICEM

EXORNANT

PUBLICA DISPUTATIONE TUETUR


FR. PIUS ANTONINUS TONNA

REGII NEAPOLITANI COENOBII

AB. D. PARENTE DOMINICO

ALUMNUS

ET IN COLLEGIO D. THOMAE AQUINATIS DE URBE  
SACRAE FACULTATIS AUDITOR.



ROMAE MDCCCXXVIII

TYPIS JOSEPHI ET FRANCISCI SALVIUCCI

# IVLIO MARIAE

SANCTAE . ROMANAE . ECCLESIAE . CARDINALI . DE . SOMALIA

EPISCOPO . OSTIENSI . ET . VELITRENSI

PRINCIPVM . IN . ECCLESIA . SENATORUM . CONLEGII

ANDESIGNANO

MAIORYM . GLORIA . ILLVSTRI . SVAQVE . ILLVSTRIORI

CLARIS . VBIQVE . AC . LAVDATISSIMIS

DOCTRINAE . RELIGIONIS . ET . PIETATIS . EXEMPLIS

SVBLIMIA . DIGNITATVM . INCREMENTA

PROPERE . NOBILISSIME . ADSEQVTO

HANC . DE . CHRISTIANA . HISTORIA . DISPVATIONEM

PIUS . ANTONINUS . TONNA

ORDINIS . PRAEDICATORVM . SODALIS

FAMILIAE . SVAE . PATRONO . AMPLIFICATORI . VINDICI

OPTIMO . BENEMERENTI

PERENNE . GRATI . ANIMI . TESTIMONIYM

D . O . C

## EMINENTISSIME PRINCEPS.

**Q**ui magnum aliquod in terris nomen, dignitatisque fastigium non tam avita generis claritate, quam propria undique virtutis commendatione sunt assequeuti; ii mortalium reliquis admirationi, nobilique præterea exemplo esse consueverunt. Cum vero partim ea ratione insignem loci auctoritatem facili quoque ad benemerendum ingenio, opibusque munificis amplificare moliuntur, tum maxime omnium sibi animos, voluntatesque devinciunt. Bene igitur, bene ha-

bet, *PRINCEPS EMINENTISSIME*, quod utrumque illud, haud cæteroquin frequens vel in præstantissimo quoquam experiendum, in Te uno satis, abunde, cunulatelyque repperim, cui meum hocce *Academicæ* exercitationis specimen in *Christianæ Historiæ* selectiora capita commendare, penitusque devovere constitui. Queis namque ipse præclaris, egregieque functis muneribus, *Vaticanæ* qua nites *Purpuræ Decus* jam longo ab hinc ævi spatio exornaveris, nemo est in alma hac Urbe, ac toto pene dixerim *Christiano orbe*, quem lateat. Atque ea ob id ne fusius numerando percenseam, duo præsertim efficiunt: rerum imprimis a te gestarum comperta magnitudo, eademque oppido spectabilior modestia tua. Sed illa demum quæcumque fuerint, non idcirco vetant, insigne aliud hoc loci commemorare; tuam videlicet singularem, planeque eximiam in nos munificentiam, cui me tot, tantaque debere profiteor. Mei namque decoris, atque emolumentum fore ratus quidquid tutelæ et auspicii, quidquid faustitatis & gloriæ in familiæ nostræ præsidium, atque ornamentum derivetur; haud possum exinde quin animo jucundissimo repetam, verbisque alacriter promam qua mente, ac studio, qua largitate ac favore rebus ubique nostris amplificandis ipse profueris, ex quo earum Tibi sollicitudinem ac clientelam *SS. D. N. LEO XII. Pont. Max.* (quem Deus in ævum servet incolumem) pro sua in *Ordinem benevolentia* demandavit. Adeo nimirum creditam tibi curam tot licet septus gravissimis *Ecclesiæ* negociis impense hactenus, prospereque gessisti, felix ut jam te Duce ac Patrono *Guzmanæ Soboli* spes affulserit, majorum hinc instauratis exemplis cito instructum, simulque e castris evocatum iri strenuam illam *Fortissimorum* aciem, cujus ope germana

*Fides nullo non tempore ab hæresum adgressionibus tuta mirificos egit de perduellium impietate triumphos. Age propterea iis imposterum fausto omine celerandis votis, conatibusque nostris adesto. Jam enim video decoram hanc Thomæ Aquinatis Palestram novis in dies trophæis, insignibusque, tuo Patrocinio ditari, lectosque in ea dimicantes tanti Doctoris assecclas ad arcem illico divinæ Sapientiæ propere, naviterque contendere. Ac me licet præclaros inter illiusmodi sapientiæ, doctrinæque cultores imparem viribus, exiguumque ingenii sentiam, haud inde deterreo, cæptisve desisto, vel arduo utcumque litterarii hujusce certaminis ingruente periculo. Quod namque illud præcelso, atque inclyto tuo nomini inscriptum velim, eo confestim veluti munimine tectum, vindicatumque iri non ambigo. Quin & aliud præter id metui, atque oneri ex parte levando accedit, quod nempe ad hoc aleæ plenum opus exigendum non mea me voluntas impulerit, sed maxime illius, qui summas apud nos Regiminis habenas ad hanc usque diem sapientissime moderatus, egregie item studiorum nostrorum incremento, felicitatique consuluit. Quod si nullam ego ejus in me meritis, vicem hactenus videor rependisse agam nihilominus, enitarque deinceps ne cujusquam eorum, quæ mihi contulit, ipsum aliquando pœniteat. Quam etiam, ob rem te huc denuo PRINCEPS EMINENTISSIME, oro, obtestorque, ut me jam jam in arenam venientem tuo auspicio tueare; totumque dein conatus, atque laboris exitum, si modo dignum tua præsentia facturus sum, tuum illico habeas, putesque omnino eo a me proditum obsequentis, gratique animi testimonium, votumque ab Cætu nostro perenne pro tua diu incolumitate nuncupatum.*



## HISTORIA EXTERNA.

7

### FATA ECCLESIAE PROSPERA.

1.

Constantinus Imperator, quem jure optimo invictissimum Christianismi Cæsarem appellaveris, haud fecte, aut larva tenus, quod heterodoxi plerique blaterant; sed vere, totoque ex animo Christianæ Religioni nomen dedit.

2.

Id vero cum alia, tum illud præsertim cœleste signum effecit, quo inclyto eidem Dynastæ Maxentium Tyrannum oppugnaturo fulgidissima in aere Crux apparuit, eo mox litterarum emblemate radiante. *Hac vince.*

3.

Quæ oppido illustris, omnique ævo celeberrima apparitio; luculentis adeo, firmissimisque historiæ monumentis evincitur, ut perperam omnino, quod Voltairio placuit, ceu bellicum stratagema, facinusque ab Imperatore confictum traducatur.

4.

Ludit quoque, quin frustra obniscus temere garrit ea de re Lutheranus Fabricius, cum insolens quoddam, at interim naturale Phenomenon Constantinianæ apparitioni explicandæ comminiscitur.

5.

Jam felix pientissimi illius Augusti ad Sacra Religionis transitus, quo promptiorem ipsum agnitæ Fidei veritati ab initio

devovit; eo adhuc magis imposterum germanæ cultus Professioni allexit, devinxitque, ut nulla unquam nec Arianæ, nec alterius cujusque haereseos contagione sorduerit.

## 6.

At strenuus licet, inhiansque in dies susceptæ Religionis incrementa propere hæc ipsa urgere nequicquam desierit Imperator; his nihilo minus talem undique navavit operam, quæ & nobilissimum veritatis Patronum, & Principem sane æquisimum deceret; nulla scilicet populis in fidei obsequium redigendis illata vi, terroreve pænarum.

## 7.

Opibus equidem, insignique Regiæ autoritatis patrocínio Christianæ Societati amplificandæ se totum dedit Constantinus; atque adeo id negotiî impense moliebatur, ut se olim Catholicos Antistites alloquens exteriorem Episcopum appellarit, quamquam is proprie, nec sacra obierit ministeria, nec jus quodpiam in Ecclesiæ Regimine obtenderit.

## 8.

Quin integra prorsus, illæsaque Ecclesiæ administris Sacrorum jura esse voluit; horumque vindices Christianos Præsules, ac summum eos inter Hierarcham Sylvestrum Romanum Pontificem magno semper in honore, potestateque se habere monstravit.

## 9.

Sed minime tamen ea de causa, aliisve inferendum Imperatorem ab eo Pontifice Romæ baptismo donatum; quod certe ad suburbana Nicomediæ instante vitæ exitu suscepisse, insigniora quæque historicæ veritatis argumenta suadent.



10.

Ob id quoque ruit male parta illorum opinio, qui ex apocryphis Sylvestri actis commentitiam illam Donationem effinxere, qua Imperator Pontifici eidem Romanæ urbis, atque adjacentis Regionis temporale Dominium contulisse ferebatur.

11.

Cæterum quod magis interest prospera Ecclesiæ fata, illud est omnibus exploratissimum, alios item ab Constantino sequiori ævo Imperantes, illius plane in Religione amplificanda hæsisse vestigiis; atque in occidente quidem post divisum Imperium reliquis longe admodum prævisse M. Clodovæum, Rhemis ab S. Remigio baptizatum.

12.

Atque illud porro insigne quod fertur prodigium, delatæ cœlitus per columbam ampullæ chrismatis dum sacro Rex gurgite mergeretur historicæ probabilitatis fines nequidquam excedere cordato cuique facile suadetur.

### FATA ECCLESIAE ADVERSA.

13.

Rei Christianæ felicitas quarto ineunte sæculo, haud levi hercle infortunio turbari cœpit, ob motam Diocletiano Imperante in Christi asseclas persecutionem, quam sævam, diuturnam, atque cruentam necibus, ærumnisque fuisse constat.

## 14.

Perperam inde atque adeo in Rem Christianam contumeliose obganniunt Dodwellus, Gibbonius, ac Voltairius non tam acriter bellum illud efferbuisse; nec late admodum debachatam Tyrannidis iram, cum ex adverso id plane liqueat satis ingentem Christi athletarum multitudinem, ubique ferme regionum ea ingruente clade occubuisse.

## 15.

Novum interea, illudque teterrimum, specie quamvis minus atrox, malorum agmen Christianæ Reipublicæ impendebat medio circiter sæculo quarto, vix nempe ad Imperium evecto apostata Juliano. Vaferrima ille, eademque dirissima persecutione universam qua late patebat Christifidelium societatem adortus est; huic namque cædis instar effusa contemptio, ipsaque armorum vi crudelior plane fuit ab orco remeans idololatrica superstitio.

## 16.

Sed illi protinus vires, opemque ad Christianæ Religionis exitium additurus Julianus, cum vel Judaicam impietatem fovet, urgetque Proselytos Hierosolymis ad templi molem instaurandam, divinæ confestim ultionis ira deterretur; quod miro sane prodigio quassata motibus terra, illiusque e visceribus igneis erumpentibus globis, atque omni demum structuræ apparatu everso contigisse, adversus Basnagium, aliosque defendimus.

## 17.

Hæc dum excurrimus castiganda obiter nonnullorum, præsertim Montesquieu vesana prorsus in Julianum assentatio, qua

maximis illum Principibus æquiparandum , Constantino insuper præferendum existimat a quo longe admodum & ingenii præstantia , & bellica fortitudine abluisse compertum est.

## HISTORIA ECCLESIAE INTERIOR.

### DE ROMANIS PONTIFICIBUS.

#### 18.

Absonam penitus eorum opinionem ostendimus , qui , ut probrum R. Sedi atque invidiam conflent S. Marcellinum P. Idolis thus adolevisse contendunt, ob idque in Apostolica Petri Cathedra orthodoxæ doctrinæ magisterium temerasse.

#### 19.

Audax item , putidumque Basnagii commentum est Melchiam Romanum Pontificem vicaria Constantini Imperatoris autoritate R. Concilio præfuisse, in eoque Sententiam pronunciasse adversus Donatistas.

#### 20.

Zosimi judicium in causa Cœlestii Pelagiani nequicquam hujus haereses ab eo Pontifice probatas evincit, ut parum æque, nimisque etiam imprudenter existimavit clarissimus Auctor *Defens. Declar. Cleri. Gallicani.*

#### 21.

De Liberio autem , deque Fidei ab eo subscripta formula, quidquid demum autument Theologi , scriptoresque rerum Ecclesiasticarum ; id nos apprime ratum exploratumque habe-

mus Pontificem illum Arianæ hæreseos , impietatisque luto minime hæsisse.

## 22.

Merito ab veri nominis sapientibus redarguuntur Launojus, Villersius, aliique Vigilium Romanum Pontificem in controversia *Trium Capitulorum* de turpi inconstantia , animique imbecillitate postulantes.

## 23.

S. Leo Primus nomine, ac re inter Pontifices vere magnus divino sui primatus jure usus est cum Ephesinæ II. , itemque Chalcedonensi Synodo autoritate præscripsit, quid contra Eutichetem esset finiendum.

## 24.

Hinc veram germanamque Primatus illius rationem aut minime assequuntur , aut maxime lædunt , qui datam ab eodem Pontifice ad Flavianum Epistolam Chalcedonenses Patres suo velut juri , atque examini subjecisse contendunt.

## 25.

Divus Gregorius Magnus illustris ut erat Religionis , Christianæque pietatis vindex , non equidem Imperiali delegatione usus, quod Archipræsul Parisiensis De Marca obtrudit; sed Apostolicæ Potestatis officio legem illam optime temperavit, qua pridem vetuerat Mauriûs Imperator ne milites monasticam vestem induerant.

## 26.

Dialogorum Libros, præclara illa omnigenæ eruditionis volumina laudato Pontifici abjudicare, sanioris criticæ canones ve-

tant; nec aliquid insuper operis ejus dignitati officiunt nævi plerique ab Dallæo Calviniano homine notati.

#### DE CONCILIIS.

##### 27.

Illiberitana Synodus, nec post Nicæni Concilii tempora; nec ante Novatianam hæresim; sed imminente Diocletiani, Maximianique persecutione celebrata est.

##### 28.

Illius vero, haud parvi faciendam in Ecclesia ducimus auctoritatem, in cujus fide nihil non integrum, in cujus disciplina nihil non sanctum.

##### 29.

*Plenarii Concilii* nomine in quo de baptismo hæreticorum finitam & eliquatam controversiam scribit Augustinus, nullatenus Arelatense primum, sed generale Nicænum intelligendum arbitramur.

##### 30.

Atque illud porro non ita M. Constantini auctoritate indici potuit; quin sua ob id Sylvester R. Pontifex aut præiret sententia, aut placito lubenter annueret.

##### 31.

Vero nequaquam similem arbitramur, quam plerique referunt historiam Paphnutii Patres in ea Synodo obtestantes, ne majoribus Clericis, Presbyterisque jam conjugatis continentiae jugum imponerent.

## 32.

Quod de Nicæna nuper innuimus, idem prorsus & de Ephesina tertia Synodo sentiendum arbitramur; eam nimirum ab Juniore quidem Theodosio, at minime sine interventu, authoritateque Cœlestini R. Pont. convocatam.

## 33.

Cyrillus autem Alexandrinus Episcopus, & Patriarcha haud proprio, quod perperam effutit Basnagius: sed laudati Cœlestini nomine illi Synodo præfuit.

## 34.

Rite admodum, æquissimeque in causa Theodoretī se gessit magna OEcumenica Synodus Chalcedonensis, dum illum etsi ut Catholicus ab R. Pontifice fuisset ad communionem receptus, quo tamen ab hæreseos suspicione se plene purgaret, hæresim ipsam, illiusque authorem damnare coegit.

## 35.

Quinta Synodus *Tria Capitula* juste damnavit; in eaque præterea agendi ratione, sibi omnino superiorem Vigilii R. P. auctoritatem agnovit.

## DE ECCLESIASTICA DISCIPLINA.

## 36.

Diu ante Sardicensis Concilii tempora causarum Ecclesiasticarum ad R. Sedem appellationes jure obtinuisse constat; nec aliud exinde Sardicensium Canonum editione factum est, quam jus illud novo superaddito robore firmitus instaurare.

## 37.

Haud itaque Canonum eorundem germanam significacionem assequuntur, vel eandem temere omnino pervertunt, quotquot Quesnellio, Febronio aliisque hujus ingenii morem gerentes effutiunt, nil aliud ea lege sancitum quam *Jus decernendi recognitionem Judicii*, at minime veram judicandi potestatem R. Sedi attribui.

## 38.

Nec illæ jam, quæcumque demum fuerint sive Clericorum, sive Antistitum ad R. Pontificem appellationes, eam ullatenus conditionem præseferunt. *Salva Conciliorum Generalium autoritate*; quin potius hac de re mentio nulla in exemplis illustrioribus appellationum S. Flaviani & Theodoreti.

## 39.

Etsi ob immanes tribus prioribus Ecclesiæ sæculis in Christi assecclas ingruentes persecutiones SS. Reliquiarum cultus non adeo frequens extiterit; eidem nihilominus præter Divina Scripturarum atque Traditionis oracula: vetera insuper Ecclesiasticæ antiquitatis monumenta suffragari exploratissimum est.

## 40.

Idipsum præterea de Sacris Divorum Imaginibus adversus Iconomachos, ac Neotericum Calvinistam Dallæum jure optimo adfirmamus.

*Publica de his erit Academia ad S. M. supra Minervam  
die 11. Augusti hora 21.  $\frac{1}{4}$  a meridie, Præsides Fr. Angelo Vin-  
centio Modena Hist. Eccles. et Loc. Theolog. Professore.*

*~~Et~~ Facto cuique a tertio jure contradicendi.*

NIHIL OBSTAT.

*D. P. Del Signore pub. Prof.*

---

IMPRIMATUR.

*Fr. Dom. Buttaoni M. S. P. A. S.*

---

IMPRIMATUR.

*J. Della Porta Patr. Constantinop. Vicesg.*




# EPISTOLA PASTORALIS

AD CLERUM

ET

POPULUM LARINENSEM



ROMAE 1829  
APUD JUNCHIUM ET SOC.  
*Praesidium facultate.*

10/10/10

10/10/10

10/10/10

X 3 X  
VINCENTIUS LA ROCCA

SACRAE THEOLOGIAE DOCTOR

DEI, ET APOSTOLICAE SEDIS GRATIA

EPISCOPUS LARINENSIS

*Venerabilibus Fratribus, et Amantissimis in Christo Filiis,  
Dignitatibus, Canonicis, Parochis, utrique Clero, Vir-  
ginibus Sacris, Ordinibus, Populoque Dioecesis Suae,*

PACEM, ET SALUTEM A DOMINO SEMPITERNAM.

---

Sola Dei misericordia, et Apostolicae Sedis gratia ad praesentationem Religiosissimi Regis Nostri Francisci I.<sup>i</sup>, quem Deus semper sospitet, ad Larinensem Episcopatum assumptus de mea ad tantum opus imparitate loqui operae praetium non existimo. Scriptum est enim: *quod potest Deus de lapidibus suscitare Filios Abbrae: ideoque in Domino speravi; et non confundar. In manibus Domini sortes meae.*

Vos autem ipsi tenuitatem meam cognoscitis; et cum Anno millesimo octingentesimo decimo septimo Sa: Mc: Pii Papae Septimi Pontificis Maximi Apostolica mandata exequabar, vos verba mea audistis, et ego lenitatem, et docilitatem vestram cognovi. Usque ab eo tempore condolebar iis, qui ignorant, et errant; quoniam et ipse circumdatus sum infirmitate.

Non mittor igitur ad Populum ignoti sermonis : *Cognosco oves meas , et cognoscunt me meae* . Vos omnes , et singuli vidistis meam indolem , ingenium , mores . Cum advena essem inter vos , Deo adjuvante , pro salute Animarum , quas Jesus Christus suo sanguine redemit , laboravi : nunc vero cum missionem Apostolicam , characterem Episcopatus , et Spiritus Sancti charismata , ut in Domino confido , recepi , pascam in corde meo gregem meum , quaeram ovem , quae erravit , ac meis impositam humeris reducam , curabo infirmam , et Dei auxilio mortuam suscitabo .

Qua de re Vos primum alloquens praestantes Dignitates et Canonici Cathedralis Ecclesiae Larinensis , quos gaudium , et Coronam meam appellabo , vos qui optimam partem elegistis , illam nempe adstandi ante Altare Dei ut Seraphim in Caelis , psalmisque , et Canticis Sancto Sanctorum assiduas laudes persolvendi , hoc a vobis exoptat Episcopus vester , ut quemadmodum honore , ita et virtutum specimine caeteros de Clero praecellatis . Vel de hoc tantum vos rogo , ut quotidiana psalmodia vestra talis sit , quae ad *Tronum Dei cum odore suavitatis ascendat semper* . Mementote sacras preces non deprecantibus tantum , sed et caeteris multum prodesse : scriptum est enim *Orate pro invicem : multum enim valet deprecatio justi assidua* . Mementote insuper quod praecipua Ecclesiae militantis propugnacula sint praeces publicae , et *Juge sacrificium* . Tandem omnem curam mecum impendite in administratione Dioecesis , Sacri Seminarii , Confraternitatum , ac Locorum Piorum publicae beneficentiae . Cavetene propter avaritiam super Vos cadat Aeterni maledictio : *comederunt sacrificia mortuorum , multiplicata est super eis ruina* . Ad majorem ergo Dei gloriam Seminarij Alumnorum Ecclesiasticorum , Hospitalis Pauperum infirmorum reparationi , consulamus : Mecum

etiam accurite, ac collaboratores mei estote in providendis Puellis praesertim periclitantibus, in pauperibus Adolescentibus ad bonam, et Christianam frugem informandis, ac denique pro Domus Dei, et pro humanitatis, et publicae Salutis cura in restauratione collabentium Sepulcrorum.

Vos vero Sacri Animarum Pastores, quorum sollicitudini multae Gregis partes commissae sunt, mementote quod vestram sit quam plurimas hosti illi maligno, et veteroso praedas auferre. In hisce speciatim temporibus, in quibus falsa quaedam Philosophia perniciosa dogmata spargens homines a recta semita ad veram trahit perditionem: Maximum profecto est infortunium effrenata illa proclivitas imitandi exempla, mores, et linguam ultra Montium advenarum. Proh Deus Immortalis! Quantae iniquitates alienae, cum aliena lingua ab incautis fuerant degustata! Ecclesiae igitur lacrymas de multorum filiorum lapsu detergite, illos miseros relevate, debiles confortate, superbis resistite, vigilantia, prudentia, sacroque divini Verbi pabulo omnibus praesto estote.

Pari modo Vos Sacerdotes, et Levitae. Vosque electi Dioecesis Alumni Seminarii, qui in quadam veluti sacra palaestra ab ineunte aetate exercemini; prae oculis habetote, quod Populi Christiani bonum pendet a Clero. Ante oculos habete, quod statuit Sacrosanctum Concilium Tridentinum *de vita, et honestate Clericorum*. Otium igitur vitate: Cor enim enervat, atque hebetat spiritum. *Attendite diligenter lectioni, exhortationi, doctrinae, et Sacrorum canonum observantiae: Sic enim salvos facietis vos, et eos, qui vos audient*. Cui quidem doctrinae, de qua hic loquitur Apostolus: si pro viribus operam navabitis, sublimis adeo sacrae militiae, cui addicti estis in mentibus vestris idea exurget; ut ne dum cuilibet oneri subeundo, ad quod

vocabit vos Deus, idoneos, expeditosque vos reddet; sed vestros quoque ita diriget actus, ut si verba, et exempla vestra Sectatoribus Saeculi inania futura sint; efficient tamen, ut illi *obmutescant*; atque ita saltem Religionis Jesu Christi decus, sartum tectumque custodiatis (\*).

At vos Sacrae Virgines, eo quia a Mundi consortio, et periculis sejunctae numquid vobis tantum elaborabitis? Nequaquam. Dilectissimae in Domino filiae. Nam Vos de militanti Christi Ecclesia estis, quin et illustriorem in ea tenetis locum. Studendum igitur Vobis est, ut Mundo, quem reliquistis, magis magisque per fidelem Regularum observantiam commoriāmini: dein cum fiducia ad Coelum manus extollite. Nam cum Sancta Dei plebs inter strepitus. Terraeque angustias suos ad Caelestem Patrem clamores efferet, illa profecto a Secretis gemitibus, suspiriisque vestris potenter juvabitur: *adjuvant enim Sanctae Plebis clamores, suspira, et gemitus Columbarum.*

Vos e contra, qui sub Divi Francisci stemmati nomina dedistis, Sacri Coenobitae, quos tamquam Speculatores Sanctarum Ecclesiae Turrium posuit Deus, fervorem vestrum excitate, vigiliisque renovate nunc temporis vel maxime, in quo humanae stirpis terribimus hostis tantas sibi parat latebras, atque recessus. *Ponita igitur corda vestra in virtute ejus, et distribuite domus ejus, ut enarretis in progenie altera.*

Similiter ad vos sermonem convertam Optimates Amplissimi Magistratus, et Civium Ordines Universi, rogans vos, atque obsecrans, ut *alter alterius onera portetis, et*

(\*) Ille tam necessarium opus efficient Ecclesiarum Statuta ad normam ultimae Bullae praestari Pontificis Pii VII. - Impensa qua praemimur sollicitudo a Pio Nostro Rege I. m. Ferdinando I. impetratae Anno 1819. cum solidali cura Filii Piusissimi Francisci I. pro observantia decretorum S. G. T. praesertim „ de Ecclesiis receptivis, et Patrimonialibus. Hujus naturae poenae sunt omnes Ecclesiae Nostri Regni Divino Cultui, animarumque salutis dicatae.

sic uniuscujusque onus levius fiet. Qui enim vel sanguinis nobilitate, vel munerum splendore clarescitis, quo magis virtutum exercitio praestabitis, eo plus in inferioribus aedificationem effundetis. Qui vero majorem Populi partem constituitis, quo majus sobrietatis, docilitatis, modestiaeque vestra experimenta exhibebitis, eo majorem apud Deum gratiam comparabitis; ut eos, quos ad regimen vestrum elegerit, prudentia, charitate, zelo, et justitia instruat abundantius.

Nec vos silentio praeteribo Patres, Matresque familias, quibus curam concredidit Deus educandi, atque excolendi Filiorum Animas, quas redemit Sanguine Suo, Vos, quibus commissum est in parvulorum cordibus prima virtutum, fideique semina instillare: ne, quaeso, unquam dulcis hujus muneris vestri obliviscamini, sanctificandi scilicet Vos ipsos in sanctificandis liberis operam dando: Parens enim, ait, Divus Paulus *Sanctificabitur in filiis*. Ut hoc vero assequamini, quam pro eorum mortali vita impenditis curam, eandem saltem pro spirituali, et aeterna impendatis necesse est. Copiose autem vos ipsos alite divini verbi pabulo, Sanctis nempe Cathechesibus, caeterisque piis instructionibus, quae numquam Vobis deerunt, et quibus, Deo opitulante, per quam sedulam navabo operam.

Insuper Vos omnes Charissimi meae curae Pastoralis concrediti oro, atque obsecro, ut hisce temporibus a falsis Philosophis caveatis; qui non sophi, sed sophisti jure merito appellantur. Cavete etiam a falsis Prophetis, quorum ingens est numerus, quique *Dei nostri gratiam transferentes in Luxuriam*, ad planas, florescentes; mollesque percurrendas vias doctrinis, et exemplis blandiuntur. *Est via quae videtur homini recta, novissima vero ejus ducunt ad mortem.*

Tandem preces mecum Deo Optimo Maximo fundite pro SSmo Pontifice Nostro Pio Papa VIII., ut ipse salvum, et

incolumem custodiat , et conservet pro totius Christianae Reipublicae bono .

Et pro piissimo Rege Nostro Francisco I., et Religiosissima Regina Nostra Elisabeth , et tota Augustissima Regia Familia ; ut Deus , et Dominus noster ab omni adversitate servet incolumes , adiciens annos eorum usque in generationem , et generationem .

Vobiscum sit Pax ; et Gratia Domini Nostri Jesu Christi in Spiritu vestro .

Dabam Romae extra Portam Caelimontanam ipso die Consecrationis Nostrae .

# NIHIL OBSTAT

D. Paulus Del Signore pub. Prof. Cens. Theol.

# IMPRIMATUR

Fr. Joseph Maria Velzi Sec. Pal. Ap. Mag.

# IMPRIMATUR

Joseph Della Porta Patr. Const. Vicar.